

# Molaetsa oa Ba-Heberu



## SABATHA MANTSIBOEA

**Bakeng sa Boithuto ba Beke Ena Bala:** *Ba-Heb. 1:5-14, Luka 1:30-33, Lipes. 132:1-5, Ba-Heb. 2:14-16, Ba-Heb.5:1-4, 1 Pet. 2:9, Ba-Heb. 8:8-12.*

**Teman'a Khopolo:** “Joale, sehlooho sa taba tseo re li boletseng, ke hoba re na le moprista e moholo hakalo, ea lutseng letsohong le letona ho terone ea Boholo maholimong.” (*Ba-Heberu 8:1*).

**T**okomane ea Bajua e ngotsoeng mashome a se ma kae a lilemo kamorao ho Ba-Heberu, ka selemo sa bo 100 a.d., e phuthetse thapelo: “Tsena tsohle ke li buile kapele ho uena, Oho Jehova, ka hoba u itse ke ka lebaka la rona o bipileng lefatše lena. . . . ‘Me joale, Oho Jehova, bona, lichaba tsena, tse baloang e se letho, li re hateletse ‘me lia re metsa. Empa rona sechaba sa hau, bao u re bitsitseng matsibolo a hau, a tsoetsoeng a ‘notši, ba nang le cheseho ho uena, ‘me ba ratoang ka ho fetisisa, re neetsoe matsohong a bona.’—James H. Charlesworth, ed., *The Old Testament Pseudepigrapha*, pok. 1, [New York: Hendrickson Publishers, 1983], leq. 536.

Babali ba Ba-Heberu mohlomong ba ne ba utloa ntho e tsoanang. Haeba e ne e le bana ba Molimo, ke hobaneng ha ba ne ba feta mahlomoleng a ma kalo?

Ka mokhoa o joalo, Pauluse o ngolletse Ba-Heberu ho matlafatsa tumelo ea balumeli har'a matšoenyeha a bona. O ile a ba hopotsa (le rona) hore litšepiso tsa Molimo li tla phethahatsoa ka Jesu, ea lutseng letsohong le letona la Ntate, hape ea tlang ho re nkela hae haufinyane. Nakong ea joale, Jesu o ntse a re buellela hore re fumane mahlohonolo a Ntate. Kahona re lokela ho tsoarella ka tieo ho ea fihle getellong.

*\*Ihute thuto ea beke ena ho lokisetsa Sabatha sa la 8 Pherekhong.*

## Jesu ke Morena oa Rona

Taba ea sehlooho ea Ba-Heberu ke hore Jesu ke ‘Musi, ea lutseng letsohong le letona la Ntate (*Ba-Heb. 8:1*). E le Molimo, esale Jesu e le ‘musi oa maholimo le lefatše. Empa ha Adama le Eva ba etsa sebe, Satane o ile a fetoha ‘musi oa lefatše lena (*Johanne 12:31, Johanne 14:30, Johanne 16:11*). Leha ho le joalo, Jesu o tlike ‘me a hlola Satane sefapanong, ‘me a buseletsa tokelo ea ho busa ba mo amohelang e le Molopolli oa bona (*Ba-Kol. 2:13–15*).

Khaolo tse peli tse qalang tsa Ba-Heberu li tsepame ka ho khetholloha tlhomamisong ea Jesu e le Morena.

### **Bala** Ba-Heberu 1:5–14. Ho etsahala eng moo?

Litemana tsena li hlophisitsoe ka likarolo tse tharo. Karolo ka ‘ngoe e lelekella ntlha ea tšebeliso ea tlhomamisano ea Mora. Pele, Molimo o amohela Jesu e le Mora oa Hae oa borena (*Ba-Heb. 1:5*). Bobeling, Molimo o tsebisa makhotla a leholimo Mora, ba mo khumamelang (*Ba-Heb. 1:6, 8*) ha Jehova a phatlalatsa puso ea ka ho sa feleng ea Mora (*Ba-Heb. 1:8–12*). Borarong, Molimo o hlomamisana Mora—phetisetso ea matla ka kotloloho (*Ba-Heb. 1:13, 14*).

E ‘ngoe ea litumelo tsa bohlokoa ka ho fetisisa Testamenteng e Ncha ke hore ka Jesu Molimo o phethahalitse litšepiso tsa Hae ho Davida (*sheba 2 Sam. 7:8–16 le Luka 1:30–33*). Jesu o hlahlile lelokong la Davida a hlhela motseng oa Davida (*Matt. 1:1–16; Luka 2:10, 11*). Nakong ea bosebeletsi ba Hae, batho ba ne ba atisa ho mo bitisa “mor’a Davida.” O ile a ahloloe ka qoso ea hore o ipitsa “morena oa Bajuda” (*Matt. 27:37*). Petrose le Pauluse ba ile ba ruta hore Jesu o tsohile bafung e le phethahatso ea tšepiso e entsoeng ho Davida (*Liketso 2:22–36, Liketso 13:22–37*). Hape Johanne o hlalosa Jesu e le “Tau ea leloko la Juda” (*Tšen. 5:5*).

Ba-Heberu, e fela, ea lumellana. Molimo o phethahalitse litšepiso tsa Hae ho Davida ka Jesu: Molimo o mo neile “lebitso” le leholo (*Ba-Heb. 1:4*), a mo ananela e le Mora oa Hae (*Ba-Heb. 1:5*), a tiisa terone ea Hae ka ho sa feleng (*Ba-Heb. 1:8–12*), hape a mo lulisa “letsohong le letona” la Hae (*Ba-Heb. 1:13, 14*). Ho feta moo, ho ea ka Ba-Heberu 4, Jesu o isa batho phomolong ea Molimo hape e re hopotsa hore Jesu ke eena moahi oa ntlo ea Molimo (*Ba-Heb. 3:3, 4*).

Jesu, ha ho le joalo, ke Eena ‘musi oa molao ea lokeloang ke bolateli ba rona, ea keneng ntoeng le Satane, oa moipehi.

**Ke joang re ka fumanang khothatso, haholo har’a liteko, ka ho tseba hore Jesu ke ‘musi oa maholimo le mafatše?**

## Jesu ke ‘Muelli oa Rona

Taba e thahasellisang ea thuto ea Molimo Testamenteng ea Khale ke hore morena ea tšepisoeng oa leloko la Davida o tla emela sechaba pel’a Molimo.

**Bapisa** Exoda 4:22, 23 le 2 Samuele 7:12–14; Deuteronomi 12:8–10 le 2 Samuele 7:9–11; le Deuteronomi 12:13, 14 le Lipesaleme 132:1–5, 11–14. Ke litšepiso li fe tse tla phethahatsoa molemong oa Iseraele ka morena eo oa leloko la Davida ea tšepisoeng?

Iseraele e ne e le mora oa Molimo, ‘me Molimo o ne a tla ba fa sebaka sa ho phomola lireng tsa bona. Hape Molimo o ne a tla khetha sebaka sa bolulo har’a bona moo lebitso la Hae le tla lula teng. Litšepiso tsena tsa Iseraele li ne li tla phethahatsoa ka morena ea tšepisoeng oa leloko la Davida. O ne a tla aneloa e le mora oa Molimo, Molimo o ne a tla mo fa phomolo lireng tsa hae, ‘me o ne a tla ahela Molimo tempele Sione moo lebitso la Molimo le tla lula teng. Sena se bolela hore Molimo o ne a tla phethahatsa litšepiso tsa Hae ho Iseraele ka morena ea tšepisoeng oa leloko la Davida. Morena enoa oa leloko la Davida o ne a tla emela Iseraele kapele ho Molimo.

Ho kenya mokena lipakeng mahareng a kamano ea Molimo le Iseraele ho entsa hore ho be le ho tsoela pele ha kamano ea bona ea selekane. Selekane sa Moshe se ne se hloka hore Iseraele eohle e tšephe hore e tle e fumane tšireletso le litlhohonolofatso tsa Molimo (*sheba Josh. 7:1–13*). Selakane sa Davida, leha ho le joalo, se ile sa fihlela ho amohela tlhohonolofatso ea selekane sa Molimo holim’a Iseraele ka botšepahi ba motho a le mong, morena oa leloko la Davida.

Ka bomalimabe, makhetlo a mangata marena a leloko la Davida a ne a sa tšepahale, ‘me Molimo o ne a sitoa ho ka hlhohonolofatsa Iseraele joalo ka ha a ne a batla. Testamente ea Khale e tletse litlaleho tsa kamoo bongata ba marena ao a neng a hloka botšepahi.

Litaba tse molemo ke hore Molimo o rometse Mora oa Hae hore a tsoaloe e le Mora oa Davida, ‘me a phetheha ka botšepahi. Ka hona, Molimo o tseba ho phethahatsa ka ho Eena litšepiso tsohle tseo a li etselitseng sechaba sa Hae. Ha Molimo o hlhohonolofatsa morena, sechaba sohle sa Hae se fumana molemo hammoho. Ka ka hona Jesu e leng mokena-lipakeng bakeng sa litlhohonolofatso tsa Molimo ho rona. Ke Mokena-lipakeng ka hore ke mocha oo ka oona litlhohonolofatso tsa Molimo li phallang. Tšepo ea rona ea mapomela e fumanoa feela ho Jesu le seo a re etselitseng sona.

**Nahana ka makhetlo ao u bileng le botšepahi ka oona lehlakoreng la hau la selekane. Taba ee e re rutang ka tsela eo ka eona re lokelang ho itšetleha ho Jesu feela bakeng sa Topollo ea rona?**

## Jesu ke Mohale oa Rona

**Bapisa** 1 Samuele 8:19, 20 le Ba-Heberu 2:14–16. Ba-Iseraele ba ne ba batla eng ho morena, ‘me litababelo tsee li ile tsa phethahala joang ho Jesu?

---

Ba-Iseraele ba ne ba batla morena e be moahloli oa bona le moetapele ntoeng hobane ba ne ba lebetse hore Molimo ke morena oa bona. Pusetso e felletseng ea puso ea Molimo holim’a sechaba e tšile ka Jesu. E le Morena oa rona, Jesu o re etella pele ho ea ntoeng khahlanong le sera.

Ba-Heberu 2:14–16 e hlalosa Jesu e le mohale oa libopuo a tse batho tse fokolang. Krete o tobana le sera ntoeng a le mong a be a se hlola a re lopolle bokhobeng. Tlhaloso ena e re hopotsa ntoea e mahareng a Davida le Goliatha. Kamor’a hore a khetheloe borena (*1 Samuele 16*), Davida o ile a pholosa bana ba bokhobeng ka ho hlola Goliatha. Lipehelo tsa ntoea li ne li re mohloli o tla etsa ba lehlakore le leng makhoba (*1 Sam. 17:8–10*). Ka mokhoa o joalo, Davida o ile ea ba mohale oa Iseraele. O ile a ema sebakeng sa bona.

**Bala** Esaia 42:13 le Esaia 59:15–20. Jehova o itlhalosa joang litemaneng tsee?

---

Ba-Heberu 2:14–16 e tšoaela tabeng ea hore Molimo o tla lopolla Iseraele ntoeng a le mong a talimane le sera. Ela hloko temana ena e ho Esaia: “E, ho bolela Jehova, makhotla a holehiloeng ke monna ea matla o tla amohuo a ‘ona, khapo ea mohale e tla pshemoha, hobane ‘na ke tla loantša ba u loantšang, ke lokolle bara ba hao” (*Esa. 49:25*).

Re le Bakreste re atisa ho nahana hore re tobane le Satane re le bang ntoeng. Ha re bala Ba-Efese 6:10–18, re bona hore e, re ntoeng le diabolose. Empa Molimo ke mohale oa rona, ‘me o re etella pele ho ea ntoeng. Re karolo ea lebotho la Hae; ke kahona re lokelang ho sebelisa lihloko tsa Hae. Hape ha re loane re le bang. “Le” e ho Ba-Efese 6 ke ea bongata. Rona re le kereke re apara lihloko e be re loane hammoho kamor’a mohale oa rona, eo e leng Molimo ka sebele sa Hae.

**Ho bolela eng ho apara lihloko tsa Molimo? Ke hore, ntoeng ea letsatsi le letsatsi le borona, teko, joalo joalo, re ka iphumanela joang matla a re thusang hore ka Molimo re tšepahale?**

## Jesu Moprista oa Rona e Moholo

Ba-Heberu 5–7 e hlalisa tšebetso ea bobeli ea Jesu. Ke Moprista oa rona e Moholo. Sengoli se hlalosa hore sena se phethahatsa tšepiso eo Molimo o e entseng ka morena oa leloko la Davida ea tšepisitsoeng, hore e tla ba “moprista ka ho sa eeng kae ka mokhoa oa Melkisedeke” (*Lipes. 110:4, joalo ka ha e qotsitsoe ho Ba-Heb. 5:5, 6*).

**Bala** Levitike 1:1–9, Levitike 10:8–11, Malakia 2:7, Numere 6:22–26, le Ba-Heberu 5:1–4. Moprista o ne a phetha mesebetsi e fe?

Baprista ba ne ba khethoa bakeng sa batho ho ba emela le ho buelella kamano ea bona le Molimo le lintho tse mo amang. Moprista e ne e le ‘muelli. Taba ena e ne e le ea ‘nete mokhoeng o fe kapa o fe oa boprista, e ka ba oa Bojuda, Bo-Gerike, Bo-Roma, leha e le ofe. Moprista o re lokisetsa sebaka sa ho amana le Molimo, ‘me sohle se etsoang ke moprista morero oa sona ke ho lokisetsa kamano pakeng tsa rona le Molimo.

Moprista o etsa mahlabelo bakeng sa batho. Batho ba sitoa ho tlisa mahlabelo ana e le bona ho Molimo. Moprista o tseba kamoo re ka fanang ka sehlabelo se “amohelang” e le hore limpho tsa rona li tle li amohelhe ho Molimo kapa li tle li re fumanele tlhoekiso le tšoarelo.

Moprista o ne a boetse a ruta sechaba molao oa Molimo. E ne e le litsebi tsa molao oa Molimo ‘me ba ne ba na le boikarabello ba ho hlalosa le ho e kenya tšebetsoeng.

Qetellong, baprista ba ne ba boetse ba na le boikarabello ba ho hlhlonolofatsa ka lebitso la Jehova. Ka bona, Molimo o ne a fetisa melemo ea Hae le merero ea Hae ea ho phethahatsa tse molemo ho batho.

Leha ho le joalo, ho 1 Petrose 2:9, re bona ntho e ‘ngoe esele. Rona—ba lumelang ho Jesu—re bitsoa “baprista le marena.” Boemo bona bo supa menyetla e hlolang. Baprista ba ne ba tseba ho ka atamela Molimo ka sehalalelong. Kajeno, re ka atamela Molimo ka thapelo ka sebete (*Ba-Heb. 4:14–16; Ba-Heb. 10:19–23*). Hape, ho teng, maikarabello a bohlokoa. Re lokela ho sebetsa ‘moho le Molimo mosebetsing oa Hae oa ho pholosa lefatše. O batla re rute le ho hlalosa molao oa Molimo le litaeo tsa Hae ho ba bang. O boetse o batla re mo etsetse mahlabelo a thorisole mesebetsi e molemo, e mo khahlisang. Ke monyetla le boikarabello bo bo kakang!

**Hore re feela re le “marena le baprista” ho lokela ho etsa phapano e kae maphelong a rona? ‘Nete ee e lokela ho ama joang tsela eo re phelang ka eona?**

## Jesu ‘Muelli oa Selekane se Fetisang

Ba-Heberu 8–10 e tsepame holim’a mosebetsi oa Jesu e le ‘Muelli oa selekane se secha. Taba ea selekane sa khale ke hore e ne e mpa e le seriti sa lintho the molemo tse tlang ho tla. Litšebeliso tsa sona li ne li reretsoe ho tsoantšisa, ho bontša, mosebetsi oo Jesu a neng a tla o etsa kamoso. Ka mokhoa o joalo, baprista ba ne ba tsoantša Jesu, empa e ne e le batho ba shoang le baetsalibe. Ba ne ba sitoa ho fana ka pheth-eha eo Jesu a faneng ka eona. Hape ba ne ba sebeletsa sehalalelong seo e neng e le “setšoantšo le seriti” (*Ba-Heb. 8:5*) sa sehalalelo se leholimong.

Jesu o sebeletsa ka sehalalelong sa ‘nete ‘me o re fa monyetla oa ho fihlella ho Molimo. Mahlabele a liphoofole a ne a tsoantša lefu la Jesu e le sehlabelo bakeng sa rona, empa mali a tsona a ne a sitoa ho hloekisa kelello. Lefu la Jesu, lona, le hloekisa matsoalo a rona e le hore re tle re atamele Molimo ka sebete (*Ba-Heb. 10:19–22*).

### **Bala** Ba-Heberu 8:8–12. Molimo o re tšepisitse eng selekaneng se secha?

---



---



---

Ka ho khetha Jesu ho ba Mopriska e Moholo, Ntate o ile a hlomamisa selekane se secha se tla fihlela seo selekane sa khale se neng se ka tseba feela ho se lebella. Selekane se secha se fana feela ka se neng se ka fihleloa ke moprista ea phethehileng oa bosafeleng, eo e leng motho-molimo. Mopriska enoa ha a hlalose molao oa Molimo feela empa o boetse o ngola molao ona lipelong tsa rona. Mopriska ena o fana ka sehlabelo se tlisang tšoarello. Mopriska enoa oa re hloekisa ebile oa re fetola. O fetola lipelo tsa rona ho tloha ho tsa lejoe ho ba tsa nama (*Ezek. 36:26*). O feela a re bopa bocha e le kannete (*2 Ba-Kor. 5:17*). Mopriska enoa o re hlohonolofatsa ka tsela e hlollang, ka ho re fa monyetla oa ho fihlella boteng ba Ntate ka sebele sa Hae.

Molimo o theile selekane sa khale hore se tle se supe ho bokamoso, ho mosebetsi oa Jesu. Se ne se le setle moralong oa sona le sepheong sa sona. Feela, ba bang ba ile ba sitoa ho utloisisa sepheo sa sona. Ka ho se batle ho khaohana le lisupo, liriti, ‘me ba amohela linnete tseo lisupo tseo li neng li supa ho tsona, ba fetoa ke melemo e hlollang eo bosebeletsi ba Jesu bo ba neang eona.

“Kreste e ne e le motheo le bophelo ba tempele. litšebeliso tsa eona e ne e le lisupo tsa sehlabelo sa Mor’a Molimo. Bopriska bo ne bo theetsoe ho emela sebopohe sa bobuelli sa mosebetsi oa Kreste. Moralo ohle oa khumamelo ea mahlabelo e ne e le seriti ea lefu la Kreste le lopollang lefatše. Ho ne ho se na boleng ho mahlabelo ana ha ketsahalo e kholo eo a neng a supa ho eona e phethahetse.”—Ellen G. White, *The Desire of Ages*, leq. 165.

**Ho Ithuta Haholoanyane:** Ho sa natse linnete tsohle tse molemo tse tletseng tšepo tse bukeng ea Ba-Heberu, ho boetse ho na le letoto la lithlokomeliso tse fihlelang sehlohlolo tsa sona khaolong tsa 10–12. Likarolo tsena li na le bonyane lintlha tse peli tse tšoanang. Ea pele, kaofela li bapisa moloko oa lefeelleng le babali ba Ba-Heberu. Ea bobeli, li re khothaletsa ho ba le tumelo.

Moloko oa lefeelleng ke ona o boneng matla a hlollang a Molimo a le tšebetsong ka meeka le mehlolo topollong ea bona Egepetu. Ba boetse ba utloa Molimo a bua, melao e leshome, ho tsoa thabeng ea Sinai. Ba bone topallo ea mollo bosiu le leru le sireletsang motšoare. Ba jele manna, bohobe bo tsoang leholimong. Ba boetse ba noa metsi a tsoang mafikeng kae le kae moo ba neng ba hloma metlotloane ea bona. Empa eitse ha ba fihla mabopong a Lefatše la Pallo, ba sitoa ho tšepa Molimo. Ba ne ba hloka tumelo, e leng khubu ea seo Molimo o se batlang. “Empa tumelo ha e le sieo, ha ho kamoo Molimo o ka khahlisoang kateng” (*Ba-Heb. 11:6*).

Pauluse o re, le rona joalo ka moloko oa lefeelleng, re mabopong a Lefatše la Pallo (*Ba-Heb. 10:37–39*). Menyetla le maikarabelo a rona ke a fetisang, leha ho le joalo. Ha rea ka ra utloa Molimo o bua Thabeng ea Sinai, empa re bone ka Lengolo tšenolo e fetisang ea Molimo Thabeng ea Sinai: Molimo nameng, Jesu Krete (*Ba-Heb. 12:18–24*). Potso ke hore: a na re tla ba le tumelo? Sengoli se re khothaletsa ho latela mohlala oa lethathamo la batho ba matla, le qetellang ka Jesu ka sebele sa Hae.

## Lipotso tsa Puisano:

- ① Re ithutile hore Jesu ke Mohale oa rona ea re etelletseng pele ho ea ntoeng khahlanong le diabolose. Ke joang re ka loanang hammoho, re le ngatana ‘ngoe, re le kereke kamor’a Mohale oa rona? Ke lintho li fe tse sitisang bonngoe boo ho ba teng? Satane a ka re fokolisa ka litsela li fe re le kereke? Satane o ile a fokolisa Iseraele joang nakong e fetileng?
- ② Re le balumeli, re sechaba sa baprista se tlas’a tataiso ea Molimo. Kereke ea heno e ka fa Molimo mahlabelo a molemo ka ho fetisa joang ka lithoriso le mesebetsi e molemo? Ke kopa u khetholle le ho bua lintho tse ka etsahalang.
- ③ Boemo ba hau bo tšoana joang le boemo ba moloko oa lefeelleng pejana feela ba tšelela Lefatšeng la Pallo? Re ka fumana lithuto li fe ho tšoaneng hoo?